

當香港人可以用一人一票投票係 午餐食乜野時

作者: _

Powered by [紙言](#)

#1

當香港人可以用一人一票投票係午餐食乜野時 (真實故事改編)

是咁的，我係一條蛋散，就向某部門做 I T 狗，你都知，政府好鐘意請外判 I T 狗，我地部門都好多。咁物以類聚，啲阿Sir 係唔會同我地外判狗公一齊食既，如果有後生又睇得下的狗女佢地會邀請一齊既，所以我地呢啲狗公會一齊出動搵食。

入得來做狗的有兩類，一類係出面做做下想休息下，讀下書，會入來hea一兩年；而另一類係想考公墓園服務市民的。所以啲我地個狗群流動性都好大，每年AP2放榜就走幾個，又有幾個新入來咁。

如是者，隨著部門擴展，狗隻數目就越來越多，每一日，我地都好煩惱去邊食好。因為人多總有意見，有人鐘意食A，有人唔鐘意食B咁。試過有次企向單位樓下傾左超過五分鐘都無結論。丫，漏左樣野無講，其實我地係有個TG group講邊度食飯，但隨著一代新人換舊人，而家既面孔已經唔同晒，而個近期社會發生連串一場場抗爭運動，新人舊人都向度日日講黃色笑話，就無晒人再講去邊度食飯，真係「正經野又唔見咁上心」啲。

作為IT狗，好自然諗到用科技手段而且平衡各方利益啦。拿，你又唔好似為我地係個「反送中」運動開始左先要搞「普選」是日午餐啲，其實老早有另一條口多多唔做野既蛋散話要用TG寫個robot投票，不過講完無左件事咁解。

其實本地社運都係咁，開頭個個話要勇武，無人肯衝，到有人衝，又有內鬼拉位又督灰，咁無計架，如是者，十年過去。講返我地餐飯，又如如是者，過左好幾個月，終於等到天降大任的英雄加入我地呢個狗公群。

佢寫program真係幾勁，但最重要係有heart，點知佢真係寫左個好簡單既polling出來向個TG。嘩，你實覺得救世主終於出現啦，普選應該可以解決晒啲「爭咬問題」啦。well，真係唔講由至可，一講我都差啲笑到打唔完篇文，向此情此境既香港，真係好應境。

首先，條友唔知求其定有心，個polling得幾間茶記食市揀，即係係一個有篩選既投票黎，仲要比晒堆唔知乜野鋪。即係普選特首，比CY, 777同何妖你投，正呀喂，啲人打生打死既普選，呢度幾下就實現啦。之但係，一切從呢度先開始。
。。

未完，待續～

#2

剛過去星期日，台灣大選結束左，台灣人終於趕走左大部分人唔鐘意既Korea魚。小英高票當選，唔係因為佢做得好，只係有更多人唔想Korea贏。「唔係想泛民贏，只係要建制輸」，我地呢邊都有呢個口號好多年，而咁多年來，唔係泛民做得好，而係向不公平既選舉制度下，我地都只能咁樣去保住最「關鍵一席」。

喂，食飯啫，做乜無啦啦拉扯到幾個地方既立法會同總統大選咁遠？你有所不知，我地個TG食飯Group本身都只係講下去邊度食，點知六月開始就變得好政治化，後來有埋黃店藍店，向食飯谷講政治更變得「理直氣壯」。

講咁多野，我只不過想講，即使係一個唔係太完美既投票制度下，但只係想踢走啲大家都唔想去既地方食飯，擺個基本共識，唔駛十幾條友企向樓下on99傾唔出決定，係咪都發揮唔到作用呢？

或者咁，我向度具體地講多少少食肆情況。咁呢，七八月之後，我地已經放棄左平時去得最多，後街果邊好食又大碟既深藍茶記。然後呢，過兩條街商場都有幾間ok既，但就係貴囉，而且啲越南野呀、日本拉麵都食唔飽，我地都間中去，但經濟咁差，唔明佢地點解下半年可以加價，所以又少去左。

至於呀x哥升AP1離開我哋前個個星期都去一次果間，價錢貴少少但係睇左x哥比較鐘意去，咁x哥由聽講向度做Tcon三四年先考到AP2留返向呢度做幾年就調去其他部門，小弟比agent扼入來就係佢啱啱考到AP2頂佢個位。通常做AP2會有自己圈子，同啲AP1或者其他AP2一齊食，升職都靠佢哋嘛。不過x哥升左AP2後一個星期仲有成兩三日過來同我哋班狗公一齊食，佢話啱傾啲嗶，佢都算有義氣年資又高，所以佢話去邊，大家都會跟，其實咁仲好，唔駛自己諗。

跟住要講一間向樓上好有爭議性既，呢間堅平，仲有湯有汽水，連飯都任添，不過質素呢，其實又唔係好差，大約係「乾炒牛河」會有湯咁情況，不過你唔叫牛河就可以了，佢有星洲米都食得架，而果啲餸飯係可以加飯。果個價錢你仲想食乜？自從好得果間茶記入左黑名單，呢間就成為左新寵兒啦。但唔知點解，有位來左大半年既狗公對呢間好反感，次次話去都屌嘴，但佢為左過來吹水講政治，都會跟隊。

另外有堆小黃店唔係有早由出現過湯裡面，就係服務差到爆，基於「不割席」原則，呢度就唔講太多啦。

咁既然有左個polling

，只要大家跟住遊戲規則，至少都可以趕走唔想去果間丫。「袋住先」應該比「原地踏步」好卦？

待續

#3

上回講到「袋住先」，到底「袋住先」係迷一個方法呢？

「可以走得幾遠，就走幾遠；爭取到幾多，就爭取幾多」

「空談民主，拒絕向前走，不單民主無出路，香港亦無出路。」

前特首煲軚曾曾經咁講過。

講開煲軚，又諗起當年搞「五區總辭」，本身個議題係「盡快實現真普選、廢除功能組別」，點知轉個頭泛民老大走入去中聯辦「密室會談」，deal左個區議會既怪雞功能組別，無功能組別既普通選民會納入呢個組別去投。咁既結果，到底發生左乜野事？定係只係我既「Déjà vu (既視感)」？

好似講遠左，繼續講果個「有篩選既午飯選舉」，咁個程式員其實整件咁既野出來都係為左大家方便，除左投票以外，係迷仲有其他方式去解決食飯問題呢？

於是我同其他舊同學向TG吹水講呢件事。

同學T：「食飯從來唔係民主既事，所以我地office都整左個『輪盤』每日轉一轉睇下食邊間好，返工咁多年，去邊食飯真係一件好麻煩既事。」

然後佢傳來個轉盤既相。

我：「個盤固定左咁多格，多左鋪頭點算？」

同學T：「你見唔到我地用萬事夾將啲Post-IT夾上去咩？需要變可以換，就算美國總統大選都得兩個比你揀之嘛，我地有六格。」

我：「成個『六道輪迴圖』咁，虧你地整得出，唔小心轉左落『餓鬼道』屎都無得食。」

同學T：「你知我對食無要求架？」

我：「豬都對食無要求。」

中學同學C就向政府做公務員，不過佢唔係AP，你都係想問係迷... 總之唔係紀律部隊啦！

同學C：「我地每日返來就等開飯，每朝向Whatsapp講定去邊間食，大部份時間我地都傾到去邊食，女同事多啲主見。」

我：「有女真好。」

同學C：「你都可以考呢個位，我考時有叫過你。」

我：「迷玩我啦，啲文職咁鬼悶，仲要MPS得15個point，邊夠洗？而且都唔易考到。」

同學C：「你真係唔知足，MPS15都有成三皮野，比中位數高好多架啦，又多時間炒股，只要唔比人派去 _ _ _，其實都唔錯架！」

我：「唔講呢啲。一陣又唔知去邊度食好！」

同學C：「不如參考下我地聖誕Party既『招標』方法，同事有主見想去食既食店/supplier會寫張『標書』，有埋大約既價錢，另外唔入標既同事可以寫返自己既budget，我地會計返個平均budget，然後『標書』最接近個平均budget就『中標』，咁就可以洗晒大家啲錢。」

我：「乜『招標』唔係『價低者得咩』？」

同學C：「食飯啫，唔駛咁認真卦？而且其實來來去去迷又係果幾間茶樓或者送上來。」

我：「但你地個『機制』真係好複雜啲！」

同學C：「做樣既啫，其實都『內定』左架啦。有啲鋪班姐仔唔鐘意，無論你點『入標』都唔會中架啦。」

我：「.....你地真係有職業病」

待繼

#4

#4 (200130)[#當香港人可以用一人一票投票係午餐食乜野時...](#) ([#真實故事改編](#))

呢個年真係唔易過，你都知我向度講個疫症。個政府又真係痴線，幫手接收埋內地病人，香港雖然係錢多，但醫療資源都唔係無限，唔係話比錢就搞得掂。一下唔小心變埋「疫埠」，真係無眼睇。向屋企「返工」係迷好「過癮」？如果可以去住旅行「返工」就係既。困你向間300呎屋試下？不過香港大多數人都係主三四百呎架啦。

今次呢單野，內地政府即刻「封城」，有人話，全世界無乜政府做到咁「果斷」，民主體制未必可以咁快手。我就唔識比反應佢地啦。不過咁，呢個世界係，係有唔同既政治或者決策制度，無話「民主」，甚至一人一票既「普選」民主先最好。有人會話，你睇下世上絕大部份「成功」既國家，都係「民主」國家。但同時間，亦有更多「失敗」既民主國家。現代民主制度唔係第一日就有，大部份成功「過渡」去「民主」既國家，都有個共通歷史，就係對其他國家進行過「搶略」，又或者佢地本身「地多人少」，大把資源。畢竟，「民主」係好高成本既制度。

今次似乎講得太遠。放假前呢，我就住眾人食飯問題向「外借經驗」。「一人一票投票」去邊食飯，只不過係其中一個決策方式。「問天打卦」有，「集體領導」協商出來都有，甚至分開食迷得囉。或者，我地真係把「去邊食飯」呢件事，搞得太複雜。

而家無啦啦幾日唔駛返辦公室，但我地個TG谷啲人無放假。唔駛一齊食飯既日子，message數量反而比平日仲大。有人不斷咁轉啲係人都知既連登「三手」news，真係煩死人。睇來呢班毒撚真係比我自己仲毒。

待續

#5

天意弄人，去到呢個位，本小說主題係講食午飯，但係而家都唔駛返辦公室住，就算返都未必會一齊食，點會去投票食飯呢？就好似要拍無女優既AV咁，最敝係連正題都未入，真係唔知篇小說點寫落去。

如果無女優的AV你地會點拍？咁唯有叫男優向度 _ _ _ ？而家我地個Group雖然每日都大量信息，但就無一條同午飯有關。即係個午飯「議會」功能無左，不過我地個真立法會功能都係無左架啦，所以呢，又無話「誰比誰更不堪」。

中午有人轉發左個所謂「IT公會」罷工信息，見到有項「按章工作」，對於我地T仔來講，都唔知比乜野反應佢好。先唔講個「公會」唔知代表邊個無代表性啦，「按章工作」呢，其實有部份T仔本身工作就比出面輕鬆，「按章工作」迷即係仲要搵野做？當然，大部份T仔都係多野做，但都係合理範圍，當我地成日都話張Tcon會約係「不平等條約」時，出面要你做到晚晚九點又無OT錢，呢度起碼準時收工。

香港既顧主，沒有最無良，只有更無良。

又講深入啲個罷工目的本身啦。從政府角度來講，其實佢已經「回應」左醫護罷工，雖然我自己都唔認為政府封部份關有效。但現實係，香港好多經貿活動啲人要過關，例如走水貨供應全國咁。另外就係，香港好多人住深圳，再高層次啲睇，香港呢個城市運作成本係好高既，如果停頓下來並唔係表面咁話唔開工住就掂，包括老闆佢地唔做生意都要交租，整個樓市同股市命脈都向度，呢樣野已經令香港好難同大陸完全一刀切割，亦係有部份藍絲既利益所在。

所以你要政府完全「封關」，唔好話背後有陰謀論唔比佢封呢樣野，單係對本身經貿民生影響都頂唔住，基本上真係做唔到。當然，我只係個打雜唔係「政務司」，唔係要幫政府講野，香港走到今時今日，唯有等社區大爆炸，自求多福，希望自己唔好中招。講到呢度，一套無女既AV，當然唔少得個男優除褲自己表演啦。我都開始慶幸自己讀書唔係最叻考到讀醫科，而家諗，做IT都唔錯，起碼唔會自己交叉感染電腦病毒，又唔駛見客，VPN返公司做野又可以繼續有糧出，呢個咁既亂世，可以咁你仲想點啫？

待續

#6

#6 (200222)

啲人成日講「冇工開都要食飯」，而家對於我哋黎講，冇工開真係唔會一齊食飯。小說開左個頭，好好睇睇點都要寫落去，咁唯有「頂硬上」。

我哋個食飯議會，如果要講，係可以講落去。之不過，香港人記憶好短暫，亦睇唔到太長遠，而家個個去搶廁紙、炒口罩，如果我向呢度講食飯，真係搵鬼睇咩？

講到呢度，按道理我地個議會應該已經玩完架啦。以「投票去邊度食飯」功能來講，的確係咁，不過雖然政府搞「在家工作」，實際上，我地間中都要分別返去一兩日的，咁個程式突然變得有用。當然唔係投票去邊間食啦，由於我地係輪住返office，而係果位好有heart的同事，改進左個robot，令大家揀唔去既食肆，咁樣，冇返既同事，就唔會去左同一間餐廳。

排除唔想出現既結果，一直都係香港人投票既方針，泛民生存既空間。好不幸今日，政府派錢冇通過到，唔知之前投左建制既有乜感想，定係佢哋覺得，派錢都唔夠派口罩實際？不過咪住先，公文黨支持三百億投疫基金，咁係乜野玩法？而政府冇口罩派啲，錢放自己袋係咪仲實際呢？

#7

呢篇小說既主題都可以話開始得生不逢時，WFH 期間，幾次想繼續寫，寫幾句就無法寫落去。

咁政府已經全面復工，我地AP

都係冇得懶，但咁唔代表我有題材，因為飯谷已經大不如前，先唔講好多人已經離開左我地部門，向呢兩三個月，大家都習慣左「小隊」同「流水」式外賣飯盒。疫情雖然是誇大左，但要搵夠八個人一齊食都幾難。而且，我地部門唔細，AP

外仲有其他同事，如果加加埋埋同一間餐廳過左八個，又算唔算犯法呢？

都係唔講呢啲啦。喂，大佬呀邊有咁離題既小說架。咁呢，早排唔知邊個向飯谷丟左條link 出嚟，話要成立AP

公會。嘩，乜料呀？臨時工都有公會？玩野呀，有啲短期合約，今日向呢度打雜，三個月後已經唔見左人，咁加入左公會玩小圈子，轉頭已經唔屬於個圈子，仲要個公會爭取既利益，同你呢個「前度」小圈子成員有衝突，點玩呀？

入會費仲要四百蚊，未見官先打三十，到底要有幾豬頭先會加入？

#8

本來，我都想接住寫落去，但係，完全連唔到筆，唯有結束左佢。